

11. 2. 650 m 51
BAPTISMUS FLAMINIS
S I V E
DE SPIRITUS SANCTI
A D V E N T U :
O R A T I O

Habita in Sacello Pontificio
AD SANCTISSIMUM DOMINUM NOSTRUM
CLEMENTEM XI.
PONT. OPT. MAX.

AB ERNESTO AMADEO Sac. Rom. Imp. Comite ab ATHEMBS
Libero Barone ad Sanctam Crucem, Lucenis, Podgora,
Fanzenberg, & Helfhenstein &c. Cathedralis
Ecclesiæ Passaviensis Canonico,
Seminarii Romani Convisitore.
A N N O M D C C X V.



ROMÆ, Ex Officina Zenobii Scalptoris SS. D. N.

SUPERIORUM FACULTATE.



CLEMENTI XI.

PONT. OPT. MAX.

ERNESTUS AMADEUS AB ATHEMBS
FELICITATEM.



*N alterum, BEATISSIME
PATER, vel obsequii er-
ga TE mei, vel Humanitatis erga me Tuæ
monumentum, & pignus. Aliquot ante men-
sibus, cum Philosophiæ studiis manum extre-
mam*

*mam imponerem, passus es exorari, Tbeses
 ut meæ non alio nomine gloriarentur quam
 Tuo. Æquiori nunc jure banc Tuis pedibus
 Orationem advolvo; quæ & habita coram Te
 est, & divini Spiritus laudes exequitur, qui
 Tuo hæret lateri, & in Te Ecclesiam admi-
 nistrat, ac regit. Excusarem, si locus, aut
 necessitas ferret, tenuitatem styli, imparem-
 que Argumento eloquentiam. At, quis nesciat
 de Deo pro dignitate loqui non posse, nisi qui
 unam ex iis linguis acceperit, quarum in-
 gens, & felix copia Sacrà Pentecostes Die
 supra Apostolorum Capita depluit. Uni Tibi
 BEATISSIME PATER ista felicitas contigit. Ex
 quo enim supra PETRI CATHEDRAM sedes,
 hæreditario quodam jure non modo Ecclesiæ
 præsides universæ; sed eâ etiam loqueris lin-
 guâ, quæ in Sionis Cænaculo Apostolorum
 Principi infederat. Hanc ille moriens cum
 Pontificia Majestate Romæ deposuit: Hac
 Decessores Tui usi sunt: Hanc in Te cum
 Augusti Principatus insignibus detulit Deus.
 Id igitur Tibi à superis precer: Ut Tuam
 banc, seu potiùs Divini Spiritus linguam
 Gentes omnes, ac Populi eâ animi Veneratio-
 ne audiant, qua Tuos ego Pedes exosculor.*

ORATIO.



Aptissimus ille Fluminis, BEATISSIME PATER, quo circa ipsum Mundi exordium Mortalium culpas ultus est Deus, Hominum scelera communi

*D. Aug.
lib. 1. de
Baptismo
contr.
Donatist.
cap. ult.*

internecione peccantium puniit, non deterfit. At ille Baptismus Sanguinis, qui, ubi venit plenitudo temporis, fluxit de fontibus Salvatoris, humanum genus non perdidit, sed servavit. Illud unice à summa Divini Numinis largitate sperandum supererat, ut quos Baptismo Fluminis puniverat Pater, quos Baptismo Sanguinis redemerat Filius; Baptismo Fluminis Divinus Spiritus recrearet fecundaretque.

Igitur Increatus Patris, ac Filii Amor, ut legem abroget servitutis, ut novam adoptionis legem ferat; non à fumo & caligine, non à ferali fulgurum luce, non demum ab horrido tonitruum, tubarumque fragore, sed à vitalis auræ sonitu, ab innocua linguarum flamma Redemptionis nostræ additamentum auspicatur.

Enim verò quorsum factum esse repente

te de Cœlo sonum arbitremur ; nisi ut è diruta Synagogæ ruderibus percussus ad ultimos usque deficientis naturæ terminos reflecteretur . Quorsum ignis non aculeatus in fulmina , sed conformatus in linguas , Apostolorum capita coronavit , nisi ut teneras Fidei plantas ad maturitatem adduceret ? Vel potius ut nata recens Ecclesia ex ipsis quodammodo cunabulis non modo non balbutiret , sed tot linguarum accessione donata , uno , eodemque tempore , quotquot aderant , populos , lingua , moribusque discordes erudiret ? Demum vehementior ille Spiritus , qui Sionem implevit , aut tepentem adhuc Sponsi Sanguine Ecclesiæ hortum Charitatis Austro perflavit , aut pensiles Amoris flammæ eventilans per omnes mundi tractus salutare disseminavit incendium .

Videor jam mihi videre primos Fidei Præcones , hoc excitatos sono , hac aurâ recreatos , his flammis accensos à Cœnaculi angustiis in publicum prosilire : & qui navi-
culariam fecerant , qui retia in piscium capturam tractaverant ; magnarum nunc rerum agitare consilia ; vitio , errorique moliri bellum ; in exterarum quasque gentes expeditionem

nem adornare : audere omnia ; timere nihil :
& modò illis spes excindendæ superstitionis
affulgeat , nec operis difficultatibus vinci ,
nec periculis frangi , nec demum mortis me-
tu à suscepto amplificandæ Fidei consilio de-
terreri .

Hinc factum est , ut decidentis Nili fra-
gor impedimento non fuerit , ne advenientis
Spiritus sonum exaudiret Ægyptius : Hinc
immodicos æstus , quibus Africa vicino à
sole torretur , aspirans è Sionis Domo aura
temperavit : Hinc æternas glacies , quibus
Natura Scytharum ingenia duraverat , immis-
sus è Cœlo flammæ imber eliquavit , ac
domuit . Hodie demum Amoris lex Hyero-
solymæ portum egressa , aspirante divini Fla-
minis aurâ , prælucentibus pro Cynosurâ ar-
dentibus linguis ad remotissimas quasque
gentes adnavigavit . Expositisque Fidei Præ-
conibus , non omnes modo errorum tenebras
veritatis luce discussit , sed etiam vitiorum
fordes morum sanctitate perpurgavit .

Pudeat hîc Romanorum exercituum
Duces splendorum nuncupationum , quas
à devictarum Gentium nomine , per popu-
lorum clades , & Regnorum excidia sibi quæ-
rere

rere consuevere : Quanto ego potiori illos
 jure compendiariâ quadam appellatione vo-
 caverim Europeos , Asiaticos , Africanos ,
 qui nullo armorum strepitu , nullâque Pro-
 vinciarum vastitate salutare Christi jugum
 Scythis , Medis , Parthis , Hircanisque , ipsis
 etiam Indiis imposuere ! Quos inter Aposto-
 lorum Principem Petrum , honestissimum ex
 hac ipsâ Urbe Orbis olim Dominâ , nunc &
 Magistrâ , nomen mutuatus , non aliter ap-
 pellaverim , quam Romanum . Ipse enim
 Urbem hanc Deo , ipse huic Urbi Orbem
 fecit Vectigalem .

Meminerit proinde Roma sui mu-
 neris esse : si fidem , quod non-
 dum pervasit , strenuè
 inferat ; ubi viget ,
 constantissimè
 tueatur .

